

嘉慶松江府志

松江府志卷五十七

古今人傳九

國朝

王頴齡字顓士華亭人廣心子康熙二年舉於鄉丙辰
成進士釋褐太常博士中博學宏儒科除翰林院編修
與纂明史日與汪琬朱彝尊陳維崧輩上下議論一時
稱良史才辛酉充日講官起居注主順天武鄉試旋陞
春坊贊善甲子陞侍講主福建鄉試還督學順天丁內
艱歸起侍讀陞侍講學士當是時

聖祖仁皇帝勅幾典學

日御講筵

命講臣進講通鑑一章項齡夙嫻史學乃融會綱目行暢
旁通每奏一篇輒蒙

睿賞庚午主陝西鄉試辛未轉侍讀學士丁外艱歸服闋
補原官己卯遷少詹事庚辰擢宗人府丞癸未陞禮部
侍郎在容臺十年凡

郊廟明禋朝會燕享封賞凱捷諸大典儀文繫縶諳練制
度酌古準今克盡寅清之職壬辰遷吏部右侍郎釐剔
弊端官方澄敘胥吏不得緣以爲奸旋充

經筵講官拜工部尙書癸巳乙未兩主會試矢公矢慎遴

拔得人戊戌進武英殿大學士

賜御製詩有迹與松喬合心緣啓沃留旬遂自號松喬老人

世宗憲皇帝登極晉階太子太傅廕一子頊齡自以年躋大耄再疏乞休

溫諭慰留備極

眷顧年八十有四卒於位

賜祭葬謚文恭頊齡天性淳恪歷事

兩朝恭慎端肅論思獻納夙夜靖共凡所汲引勿使身被者知之處大事未嘗顯立異同微言旋轉歸於允當議

定稱

旨又未嘗自詡其功在內閣八載鎮靜和平恪誠純一朝
野稱之子五人圖炳自有傳圖焯康熙五十年鄉魁圖
煥康熙四十四年舉人侯補內閣中書圖新一品廕生
侯補員外郎圖壽侯選主事

婁縣志

吳元龍字長仁婁縣人康熙三年進士選宏文院清書
庶吉士改工部主事陞郎中乞養歸覃思著述復以博
學宏儒徵擢授翰林院侍講與修明史甫三月復請終
養歸元龍文章志節推重當時人方之李元禮卒後崇
祀鄉賢所著有問月堂詩稿樂閒館文集二十四卷史

論十六卷屯政要覽二卷補水經註八卷子廷揆自有

傳妻縣志

張世綬字紫垂妻縣人安豫子康熙二年舉人選授河南洧川令縣有疑獄久不決至卽剖之歲旱禱於神輒應建常平倉濬城壕革耗羨朔望集諸生明倫堂課其文藝而甲乙之時至村落咨民間疾苦攝穎邑篆興利除弊一反前令所爲爲同考官所援多知名士復任洧川卒于任洧人哀之會建培風書院落成因肖像其中歲時奉祀穎亦築德鄰祠祀焉弟世紹字衣聞以貢授鄧州同知循謹修吏事上官檄散賑步行村落吏不敢

欺後自投劾歸

張氏家傳

程化龍字禹門青浦人休寧籍父大任以俠節聞化龍少孤事母孝受業王九徵之門康熙九年成進士考授內閣中書尋以事謫歸先是兄含文歿於南雄旅次化龍往尋骸骨蠻烟瘴雨中竟不可得招魂設祭聞者哀之從叔周量遭兵亂卒於官力爲經紀歸其喪鄧漢儀稱其質雅恬秀妙中規矩爲山巨源劉真長一流人云

青浦志

錢芳標字葆芬華亭人居高橋里士貴子生有異徵博聞宏覽天才雋麗與同里董俞齊名人稱錢董又其族

有金甫者與芳標相埒人又稱二錢云康熙五年中順天鄉榜授中書舍人與王士正朱彝尊輩倡和無虛日會舉博學宏儒巡撫以芳標名上丁內艱不赴

婁縣志

金維寧字德藩婁縣人上海籍康熙五年舉人官壽州學正與營弁爭學宮地罷歸著有秋谷文集

松江詩鈔

王鴻經字季友婁縣人廣心季子康熙十二年進士二甲第二人授翰林院編修乙卯充日講官起居注典順天試尋陞贊善己未轉侍講庚申以講筵勞加侍讀學士銜時湖廣朱方旦者自號二眉山人聚徒橫議造中說補謂中道在兩眉之間山根之上又自詡前知與人

決休咎逆藩吳三桂反順承郡王率師駐荊州方旦嘗以占驗出入軍營尋又往江南浙江所至多爲蠱惑至是鴻緒得方旦所刻中質祕書乃上疏劾其誣罔

君上悖逆聖道搖惑民心三大罪大略言方旦擁妻妾廣田宅爲子納官交結勢要所造中說補不外坐功鍊氣之術而妖黨互相標榜謂今之眉山古之尼山方旦亦居之不疑刊書流播徧游江浙乘輿張蓋徒黨如雲遠近奔走祈問吉凶常聚至數千人輒以小信小惠鉤連入教雖漢之張角元之劉福通左道疑民不過如是疏入得

自逮治伏法壬戌轉侍讀充明史總裁官癸亥轉右庶子
尋擢內閣學士兼禮部侍郎甲子擢戶部侍郎乙丑充
會試總裁官丁卯擢左都御史潮州知府林杭學嘗從
吳逆廣東巡撫李士楨舉杭學清廉鴻緒疏劾之有

詔令士楨回奏士楨引咎遂罷去奪杭學官靈臺郎董漢
臣上疏論時政御史陶式玉劾漢臣摭拾浮詞欺世盜
名請逮鞠治罪疏下九卿集議未決奉

特旨免議鴻緒因言欽天監靈臺郎博士等官其始不擇
品流星卜屠沽之徒竊識數字便得濫竽授官之後又
不專心習學勉盡職掌惟行險僥倖希圖遷擢請

敕下考試分別去留疏下禮部議行漢臣及博士賈文然等十五人皆坐黜鴻緒尋丁父憂起復未補官奉旨休致甲戌

詔召入京修書食二品俸己卯轉工部尙書督修高堰堤工以與河道總督張鵬翮議不合

召還京戊子調戶部尙書己丑復以原品休致歸里甲午以所撰明史藥具疏奏進

詔付史館乙未復

召入京修書充詩經傳說彙纂及

省方盛典總裁官雍正元年卒子二人圖煒康熙四十七

年舉人官至戶部貴州司郎中圖炯康熙五十六年舉人官長蘆鹽道孫興吾自有傳

妻志

顧昌祚字受周上海人康熙八年順天舉人知廣西江華縣縣境苗徭雜處而苗患惟徭能制前令剋減徭歲賞遂不用命昌祚如額以給聽訟公允賄賂不行民皆悅服以忤上官意左遷萊州府經歷歸著有衍象五十卷今存衍範二卷子成天自有傳

江南通志參南匯志

沈蕖字劭六原名朝棟華亭人紹賓子康熙八年順天舉人選嘉定教諭未仕卒蕖博聞疆記經史百家手自點勘未冠時陳黃門夏考功引入幾社每著一篇賦詞

雲構嘗偕同郡盧元昌茅起翔共操選政四十餘年尤
喜汲引後進遠近知名士載酒問字無虛日所著有尙
書講義琴清堂詩文集經濟草若干卷子烈字武承循

謹孝友克承家學早卒

金山志

王九齡字子武婁縣人廣心仲子康熙二十一年進士
改庶吉士授編修戊辰擢通政司左參議丁艱起復補
右參議甲戌轉翰林院侍講學士丁丑晉詹事府少詹
事遷都察院右僉都御史庚辰陞內閣學士甲申遷禮
部右侍郎兼翰林學士調兵部旋改吏部轉左丁亥擢
都御史戊子卒於官九齡性耽吟詠未第時卽以詩

詞擅名人史館著作員麗及佐吏部陟總憲盈廷建議
臨事決疑主於持正不阿退朝燕坐絕口不言政務其
嚴重如此子圖熹康熙四十四年舉人

婁縣志

楊瑄字玉符華亭人父枝起前明崇禎七年進士戶科
給事中疏請用黃道周及薦吳嘉允等有直聲瑄承家
學康熙十五年聯捷進士改庶吉士授編修主順天試
丁艱起復以撰文誤戍瀋陽旋放還特起原官歷陞內
閣學士己丑致仕癸卯再戍黑龍江卒於貶所瑄湛深
經術精研史學辨體工麗古文直造宋人堂奧詩律穩
細書法行楷亦俱入妙

金山志

高層雲字二鮑華亭人明檢討承祚孫枕蓆經史刻意爲詩古文詞嘗入京恭遇

聖祖仁皇帝臨雍層雲作賦以紀其盛文頗工士大夫交口稱之又嘗與嘉禾朱彝尊李良年集刺梅園爲聯句詩朱李名素高是日詩成層雲竟出其上自是名益噪京師康熙十五年登進士先是層雲專古文詞不治舉業至乙卯歲始肄業及之鍵戶凡四五月遂連掇科第以去人皆以爲奇登第二年授大理寺左評事甲子典廣西鄉試還

朝與修一統志尋擢吏科給事中甫受職會

文皇后上賓有

詔諸王大臣集議喪禮議既畢閣臣向諸王長跪以白而諸王安坐不少動層雲以爲非國體卽日抗疏論之

當宁竟用其言著爲令

國家方有事俄羅斯議擇臺省漢官二人將命以往同列皆惴惴惟恐遣行層雲獨慷慨請前事雖不果舉朝壯之居垣中一年遷通政使右叅議尋轉左又遷太常寺少卿卒於任年五十有七著有改蟲齋集若干卷子不騫自有傳

奉賢志

朱袞字秩公青浦人父天瑛有聲幾社袞康熙十五年

進士考取內閣中書改授江西樂平知縣樂平人生女輒溺之表諭以天性民感動俗頓改徵輸向有縣總部頭鄉約等名色爲民累袞知其弊卽禁止並革諸浮收陋規修學宮重建慈湖鵝湖兩書院充鄉試同考官袞在樂平久吏民親之巡撫宋犖將疏薦會因漕艘腳價追賠部議降調起補山西大同時厄魯特不庭

聖祖仁皇帝出塞親征前後屯兵大同踰半載袞供頓儲峙未嘗缺乏以巡撫新舊傾軋致被劾歸當事惜之

青浦

縣志

彭開和字孝緒華亭人父彥昭字韋齋明萬歷四十六

年舉人官常山知縣有廉名開祐少卽嗜學工詩古文
與錢金甫輩讀書春藻堂交游口廣春藻堂之名流播
遠邇以拔貢中康熙十四年順天鄉試明年成進士歷
任河間知縣武岡州知州並有政績歸田後著述自娛
年七十九卒著有游琴瞻雲諸稿

重刊縣志

唐子鏘字依在華亭人昌世子讀書過目成誦爲諸生
試高等以奏銷案黜益畱心經史及六官典要手錄成
書康熙十一年援例入北雍領鄉薦十五年成進士授
內閣中書以父老乞歸養遂不出延高年耆宿爲尙齒
會以娛親月爲常宗族交游有急難不惜奮身捍之文

譽翔治所丹黃本塾師奉爲主臬甲子昌世感疾子鏘
大戚侍藥餌過瘁竟先昌世二十日卒孫用烜字素原
少孤母馮撫之用烜端謹修飭事親以孝聞遇弟用祿
尤友愛時童試重卷例未嚴用烜四學並雋旣隸府庠
入成均與子姓遷居谷陽門外聚奎里閉門卻掃泊然
無他好里中數善士必及焉晚年與馮勤忠諸人踵尙
齒會馮字立山亦長者也沈大成有文序之年八十二
卒川祿後改名式南字呂錚金山衛廩貢生任阜陽訓
導唐氏世本

張集字殿英婁縣人洪子康熙十五年進士授行人擢

御史疏免漕田丈量以除民累又請釐軍政嚴州縣保題通銓選壅滯及慎用學臣等事皆有關政體歷遷左僉都御史總督戶部倉場左侍郎轉吏部左侍郎連丁內外艱服闋起兵部左侍郎尋謝病歸里居與諸名士南園觴詠宏獎謙挹性儉樸自奉若寒素好賙卹貧乏嘗建義塾於上海之筠溪年六十卒

予祭葬子棠自有傳

婁縣志

曹鑑倫字彝士婁縣人嘉興籍勳孫康熙十八年進士選庶吉士改編修典試山左所拔士如何世璠顏光敏輩皆知名士再主北闕試歷陞內閣學士與修

國史典訓方略充一統志副總裁

賜錫類堂扁額以示優寵歷陞吏部左侍郎卒年六十三

賜祭葬

金山志

錢金甫字越江華亭人居高橋里父昶有義行吳騏爲著傳金甫少負才藻制義外兼工詩古文詞康熙十七年舉博學宏儒金甫名在薦牘仍入北闈中式明年春應

御試復應禮部試榜先發中式選庶吉士尋中宏博授編修是時兩榜並登惟沈筠與金甫兩人甲子典試江西稱得人累遷侍講學士卒於任未第時從兄承吉以役

重播徒有司責金甫代役未嘗一言懟兄伯父旭客死撫遺孤以養以教長授室焉其在京師友人謫戍塞外亟稱貸得銀馳兩日夜追及贈之業師某卒於官以俸錢治其喪會鄰火延及急命舁其棺金甫邪許助力雖燎其鬚不顧他行事類如此著有保素堂詩文集秀水

朱彝尊序之

奉賢志

陸祖修字孝武清華人父從龍前有傳祖修康熙十八年進士選庶吉士改山東道監察御史疏言總河靳輔身雖在外與九卿呼應甚靈會議之時尙書佛倫科爾堪等不顧公議左袒河臣竊思河工屯田二事請俟于

成龍到京面奏後加以

乾斷從之後言事罷歸築老是庵於佘山祖修初尙意氣
風厲敢言頗詆斥佛老晚年乃自稱老是頭陀云

青浦志

王師旦字致平婁縣人康熙十八年進士知穀城縣縣
故巖邑師旦寬猛相濟民用以治乞養歸與子弟及里
中後學砥礪詩文詩格清超文體醇茂學者宗之堂弟
師植字鄴園質敏績學爲吳騏高弟騏沒無子爲卜宅
兆而葬之撫弟師導遺孤成立又嘗客金陵試寓拾遺
金還其人年八十九卒師曾字介然康熙五十三年順

天舉人

婁志

曹泰曾字彙初上海人康熙十七年舉人授莆田令莆田民好鬪善訟吏舞文爲奸賦役不均泰曾至治以廉靜吏畏民懷邑有陳生斃曾氏子命屢行賄求脫泰曾力持不可論如法又有鄭元振毆斃人命前令論絞元振與死者之子皆易初辭爲病死泰曾爭於巡撫曰傷有左證獄貴初辭下吏非懼失入之罪也失一官輕冤一命重弗聽卒以失入劾之初泰曾條六事上臺省尤以清賦役爲政本如鹽田賦重民田賦輕有業失而重額仍在輾轉告訐者立法禁止有田久掄而糧不除勻攤圖甲者將現在報墾之田以次抵豁并除徵民代匠

之弊會罷官不克行莆人思之祀名宦從弟炯曾知贛

縣亦著政聲贛人頌之

上海志參
江南通志

路垓字蒼霖華亭人康熙二十年舉人館北平黃氏侍郎叔琳副使叔琬皆其高弟也三上春官不第遂絕意仕進著有鷗村集子徐來號舒馭婁學諸生嘗與黃中允之雋鍾文學長泳唱和後中允校士閩中邀與同往歸刻閩游詩稿海上曹給事一士序之從子瑤林字湘三衛學諸生工詩著有續和陶詩及問山草青田劉瑋澤序之

奉賢志

倪景元字萬貞上海人康熙二十年武舉有故人通鹽

課百餘兩身後其子無力景元請諸有司分三限代完
海濱蘆柴多以牛車裝賣地豪霸截每車勒錢若干景
元爲白監司勒石永禁康熙三十二年大旱護塘港涸
衆議開七竈港景元謂急則治標莫若濬一竈港堵塞
水口一俟東北風起潮汛達浦而舟楫亦通從之不數
日工畢風果大作人以爲天祐云

南匯志

周金然字礪巖上海人康熙二十一年進士入翰林歷
官洗馬學問該博兼工書法嘗與修

國史一統志共事者凡有考核則告以某義某辭出某史
某傳了了若夙誦者典試湖廣山右稱得人奉

旨校輯古文戴記稱善嬰疾告歸以平日所書字幅進呈
聖祖仁皇帝御製五言詩十二韻以示褒嘉著有飲醇堂

文集

上海志

張淵字起田婁縣諸生工制舉業從游甚衆康熙二十
三年領鄉薦明年會試闈中中式以兩主試爭元不相
下榜發竟落座師徐尚書潮延訓其子本他著錄弟子
如北平黃叔琳同郡戴有祺及從孫曷得其指授並著
聲望著有燕臺雜錄及詩文等集未梓多散佚孫星諸
生屢試高等學使者目爲雲間一寶訖不遇以歲貢終
士論惜之

沈藻字火先婁縣人康熙二十四年進士授永康令永
當溫處之衝爲浙東瘠壤兵燹後民力彫瘵藻至除供
億禁火耗一應貼費皆捐俸以償歲役民夫動以千計
藻憫之爲作兜夫行出貲召募民氣稍蘇俗產女多溺
豪家置婢至老不擇配藻嚴禁之以逋欠罣誤官橐蕭
然卒於永康行寓祀名宦著有古處堂詩文等集子中

黃諸生博學工真草書

金山志

李登瀛字賓王華亭人康熙二十四年進士授新鄉令
有惠政擢監察御史在臺中多所建白賦性質樸歸里
後蕭然如寒素也子廷友雍正癸卯舉人官臨川縣知

縣奉賢
志

王奭字后張華亭人先世居後岡康熙二十七年進士
初與夏存古杜讓水竝有神童之目又嘗與杜同居西
郊立西南得朋社登第時年逾六十久在都下與湯西
崖查慎餘諸人相倡和歸後遷居金沙灘董俞舊宅所
著詩文稿今佚

松江詩鈔

王原字令詒青浦人父夢求歲貢生以學行爲陳子龍
所知原登康熙二十七年進士未及用從刑部尙書徐
乾學修一統志於包山三十三年選廣東茂名縣舊徵
糧責之里長私派民戶一石至二三十兩民棄田逃原

令編造業戶實名而里長之弊革業戶棄田遺糧攤諸
鄰戶原代爲捐輸不許派累而逃戶之歸者日集邑有
入市賣子鬻妻下令有犯者繩以法設義學禁巫覡鋤
強梁雪冤滯頒婚葬之式頌聲大作移署信化以解犯
脫逃解任弋獲復官補貴州銅仁縣縣故苗地原建學
以訓子弟教治葛以爲布焙茶榨油以爲用谿水湍急
教之造舟以興販設保正保副訓練鄉勇以禦苗患設
苗寨長貳以約束羣苗銅仁大治四十一年行取授工
科給事中時平陽知府馬思贊請以天下錢糧加一火
耗作爲正供原奏言其不可議遂寢尋以劾文選司郎

中陳汝弼姦貪狀降級歸原學有根柢從陸隴其湯斌講學一以濂洛爲宗年八十四卒著有學庸正譌論孟釋義春秋咫聞周易咫聞歷代宗廟圖考明食貨志詩文共若干卷

青浦志

徐賓字虞門華亭人居南橋康熙二十七年進士授臨城令縣有山名紫河套奸民恃險往往嘯聚賓單騎深入諭以禍福遂請降尋奉臺檄董宣城牧馬事時牧馬者以凍餓死一日至六十餘人賓廉知其故每晨煮粥以飼之俾果其腹然後執役牧人感奮養馬至萬三千匹悉茁壯倍他日繼又奉檄牧御馬於桃花口竝著

勞績內擢戶部主事升吏科給事中轉刑科掌印多所
建白至詳陳米穀虧空皆由州縣輟轉侵挪一疏尤爲
上所嘉納山左歲荒

詔發通倉米賑飢賓言自通至山東湍逆道遠不若南來
糧艘經過山東截留以賑則

詔下而米亦至疏上奉

前旨施行尋以病乞歸卒著有芝雲堂雜言芝雲堂詩稿

奉賢

志

沈宗敬字南季華亭人荃第四子康熙二十七年進士
選庶吉士改編修歷官太常寺少卿在詞垣中有清望

供奉

內廷最久

寵賚優渥康熙六十年舉行千叟宴宗敬年六十四與宴賦詩時人榮之家世工書宗敬兼工畫經進圖幅皆蒙賞名公鉅卿爭購手迹以爲重相國家人某頗用事乞畫不與復屬所厚言之卒不可得其持正如此敦尙古道悃幅無華尤能獎掖後進爲人所難云

華亭志

張豫章原名翼自號九峯散人華亭人與弟嘉樹玉樹有三張之目康熙二十七年進士第三人及第授編修歷官左中允貴州學政入爲國子監司業卒豫章在詞

以溫雅見稱少時游迹徧歷南北詩文得江山之助
皆有南帆寄亭諸集宋琬周亮工皆稱之

青浦志

程珣字潔文先世由休寧徙松居朱溪康熙二十七年
進士官內閣中書以母夙患心疾遽歸家素豐饒有園
林之勝工吟詠喜賓客慷慨好義與高謨園沈獅峯曹
次典諸人唱和著有河千草堂集

張昺字長史華亭人康熙三十年進士選庶吉士改編
修性恬淡研究理學爲陸清獻弟子安溪相國其座師
也闡中閤三策極賞其西銘之對謂闡先儒所未發入
史館後每與講論心解融釋嘗謂門弟子中穎悟無如

曷未幾卒著有西銘圖論中庸精義安溪皆錄而存之

江南
通志

陶爾穉字穎儒婁縣人康熙三十年進士知上虞縣擢
葭州知州爾穉少以詩文重於時爲高文恪士奇所知
與同郡姜遴齊名郡中自陳夏倡興幾社揚屹風騷餘
音未絕春藻大雅社事中興而執牛耳者必推穎儒與

姜萬青云

婁
志

姚宏緒字起陶婁縣人康熙三十年進士改庶吉士授
編修充明史纂修官俸滿假歸不復出性耽吟詠集松
郡自晉魏以來先達及山人逸士詩文輯松風餘韻谷

水文勻爲一郡文獻其所自著有遲就草胥浦類稿十

如塾雜鈔諸編

金山志

林子卿字安國華亭人景陽曾孫少從包爾庚李雯游
讀書日盈寸於天官地輿律呂典制以及名物象數之
學靡不綜貫三十喪偶不再娶所居一室凝塵滿榻圖
書雜陳同郡高待詔不騫每與後進言先輩善讀書者
輒舉子卿兄弟焉在蔡毓榮幕府爲撰通鑑紀事本末
一百卷歸里後太守魯超聘修松江府志著有素園稿
弟子襄字平子子威字武宜子寧字定遠子儀字元度
並以學行知名於時

江東耆舊傳
參婁縣志

沈迴字子凡婁縣人歲貢生博涉經史工詩文少時與王司農日藻曹明經偉謨及王文恭昆季同倡文社晚年教授朱涇戴殿撰有祺陶進士爾穉皆從之游著有潛積堂尺牘詩稿

金山志

顧衡字藹南華亭人父開禧見藝術衡嗜學工詩古文詞與王文恭兄弟讀書西園又與錢金甫彭開祐諸人舉春藻堂文會名噪一時康熙十八年以貢任臨淮訓導卒著有鶴巢詩鈔盤谷詩鈔

張澤萊字敕和婁縣人少與焦徵士袁熹同學相鏃礪爲文日有名以歲貢注選訓導絕意進取生平敦本務

貢見義必爲晚年置田三百畝以周族之貧者自爲修約甚具卒年七十六

張氏世傳

邵耀字宣夏華亭人父汝持前明崇禎進士官評事有文行耀承家學爲諸生僅以年資貢太學生平負藻鑒嘗於諸生中識黃中允之雋目爲國士同里王尚書鴻緒延謙諸子橫雲史稿出其參訂爲多年七十餘卒詩稿散佚今所存無題詩三十首東舉詠物詩五十首竹岡景物詩十二首行於時

奉賢志

何世澄字遇清婁縣人居泗涇康熙庚午副榜落拓恢奇足迹徧字內總督蔡毓榮欲薦之固辭後毓榮以事

繫刑部獄世澄精易卜其必免果減徙艾渾世澄請從
疏榮謝不可世澄曰公不久賜環此行適廣吾聞見再
入都當別去矣果如其言歸里後杜門避客讀書自娛
子德振字欽文康熙五十年舉人

妻志

錢茗字尙如華亭人爲諸生試輒高等康熙庚子貢入
太學敦本尙義有古一行風年七十三卒

奉賢志

曹偉謨字次典華亭人居十巷歲貢生嘗游夏考功之
門名藉甚其學長於春秋內外傳尤熟史記漢書詩學
劉賓客晚年手訂南陔集子漢禮諸生能詩

金山志

曹紳字顓書青浦人父際飛官臨城令有政聲紳由貢

生謁選授泰順令縣先時弊丁吏緣爲奸紳令民自實
不得藏隱仍置舉首法察出五家連坐由是無脫漏丁
增於昔三倍而銀不加三丁而當一丁之賦力易辦上
官才之以憂歸不復出弟國維字四張康熙二十一年
進士官內閣中書工詩早卒

青浦志

張慧字迪吉婁縣人歲貢生父潛遠得風疾日夕侍湯
藥衣不解帶者九年旣失怙母周復臥病侍疾垂二十
年一日忽霍然愈士大夫皆作詩稱其孝昆弟五人同
食遞衣終身不析爨弟荀八病瘵家人莫敢近慧不離
左右受業陸清獻之門清獻重之授周易毛詩遂著周

易探微毛詩會意四書質疑各若干卷後選繁昌縣訓導講學課士一以清獻爲宗年七十四卒學者稱胥浦先生子敦宗字調一歲貢生研精周易性理諸書及天文地理刑法賦役音律無不窮究兼工書畫張文敏重之著有靜敬山齋古文葩經心得行世

婁縣志參周大樞煥傳

邵式誥字鏡臣青浦人歲貢生游高士奇徐元文之門與陸祖修陶爾穉諸人爲詩友晚年自營生曠竝築東圃草堂以老卒年七十八著有東圃詩草從孫炎字珉高廩生少孤事母至孝有文名妻亡不再娶年未三十

而卒

青浦志

陸園字武佳華亭人居集仙街詩撫選體文工駢儷以
歲貢任興化縣訓導卒於官從子崑曾字圃玉康熙辛
丑舉人以詩名

華亭志

鄭允颺字彥康青浦人以歲貢選寶應教諭康熙二十
一年擢湖北當陽令邑自流寇殘破後餘孽尙據竹房
諸處軍興旁午咸取給於民時有紅船之役衆欲循例
派民允颺曰此例一開貽民無窮之累乃自出銀五百
使人赴漢口修造民甚德之二十八年旱災繪圖以上
監蠲本年地丁錢糧次年復行賑卹是時戶口逃散田
等甌脫允颺勸民墾荒歸者如市夏包子以裁兵倡亂

武漢黃德閔距當陽二百里舊裁之兵雜處其中人懷
反側衆議練鄉兵禁民出城或又勸修山砦爲避兵地
允颺不爲動密約邑中士大夫糾合家童暨村中勇悍
少年入城并檢役隸中強幹者習武備復召遠近裁兵
諭之曰能爲我守給若糧皆踴躍聽命城外村落置木
欄圍聚什伍扼險要人有同志賊平撤三十二年以卓
薦

命以主事同知用既去任民繪像奉之三十七年間姊喪

悲悼而卒

青浦志

王士禰字浩東華亭人讀書過目不忘甫弱冠詩文卽

贈炙人口康熙二十九年以禮經第一人薦主司擢置
乙科後竟不獲售士瀛學問淹通上自墳典下至歌曲
無不研究有自怡詩草十卷詞草一卷

續松風
餘韻

姜鑒如字暉發華亭人九歲能屬文祖雲龍亟賞之與
兄翼威甚友愛異母姊適殷殷以家難罹不測極力營
救且以故居畀之以貢授太湖訓導修學宮置祭器輯
邑志任滿歸卒著有敬和堂稿晉熙自在吟草

朱楚鵠
撰傳

畢大生字兩稼青浦人貢生詩在石湖放翁閒書學李
北海蘇靈芝工詞所作帆影簾影諸闕盛爲持賢推許
秀水朱彝尊海寧查慎行嘉善魏坤同郡高不騫皆與

友善游京師久之無所遇最後客山左卒著有秋蘭介

雅堂詩弟大啓字載積工畫竹

青浦志

蔡湘字竹濤上海人國學生生有異稟工詩文未冠游京師嘗在合肥葉尚書席上聽柳敬亭說隋唐故事座客限韻賦詩湘先成相視皆閣筆名籍甚於時海內鴻儒鉅生如新城王阮亭宣城施愚山南海程周量秀水朱錫鬯皆以宏博絕麗之才雄視當世湘以年少布衣與諸公周旋壇坫間朋簞分韻蠟屐題名其才分洵不可及年二十五客死交城聞者皆爲惋惜遺詩一編大理卿陸錫熊序而刻之

南匯志

周渭字丹壑華亭人諸生居望湖渚與鄰里匪吳口干
計子山董樛亭相倡和其詩埽除塵垢獨標清新著有
秋堂詩集及百幻詩一卷

雲間詩鈔

馮憲字个臣華亭人明廷尉恩元孫諸生工詩文善書
與張若義王光承輩結吟社於西郊賈中丞漢復聘修
通志詳贍得體弟鏐字天垂諸生有詩名並工書法年
未五十卒

雙志參松江詩鈔

袁天麟字振公金山衛人與侯指揮承祖子功藩美漢
友善時以詩文相砥礪乙酉守城天麟參其軍事城破
承祖父子俱殉天麟奉母走脫後歸衛城灌園養親以

終熊曰蘭志其略

雲間詩鈔

張憲字漢度上海人彥之弟諸生父官比部以中傷下獄憲時年少伏闕訟冤得白人以方之吉粉父沒哀毀骨立三年中未嘗以墨經見客吳梅村宋荔裳歎爲真孝子詩筆超邁流俗年八十二卒著有傳硯齋麗鵬軒

詩集

唐汝玫字次仲上海人繼祿從孫爲諸生以經濟自任崇禎己卯舉於鄉屢試南宮不第徜徉山水閒嗜酒好客有田二頃所入悉付酒家客有語及聲利者輒飲之醇酒不使竟康熙癸卯授常寧令未赴卒子士龍孝友

能詩文知名於時

上海志

李霞字澹山本姓沈華亭人諸生父沒不復試曰祿以
遠存耳吾何求杜門自勵一介不苟積館穀以營葬方
袍皂帽雖貧晏如時稱爲閒靜先生

魯志

王肅字來雍上海人由例貢授泰寧令兵燹後重以大
水田廬盡壞肅到官招流亡勸開墾修城垣緩賦役彫
黎復業以積勞卒於官士民悲悼祀名宦并建報德祠

南匯志

葉永年字丹書上海人映榴從子少以所業質王光承
一見驚異游京師會開博學鴻儒科平湖邵靜山欲薦

之永年固辭邵不可因薦同學錢金甫自代先是商邱
宋犖以詩文相契合及巡撫江南招之不往選贛榆訓
導亦不赴著有玉壺詩鈔

南匯志

曹家駒字千里華亭人諸生不求仕進爲人伉直有經
濟才同里夏允彝爲幾社主盟俯視流輩獨與家駒爲
忘年交遇事敢前不畏權勢如白糧之官收官解漕米
之官收官兌里甲之均田均役皆功在桑梓而石塘之
築賴其力尤多年八十餘卒與同里宋際莊徵騏並祀
崇闕報功祠

奉賢志

莊徵騏字武秋華亭人諸生入太學有經濟才先是松

民困賦役軍興四出供億無節凡機戶塘長漕糧諸役
應之者率破家其後賦役改爲均田均役漕糧改爲官
收官兌機戶改屬工匠塘長改爲民輸官董雖李侯之
功而贊成其事者徵騏之力爲多至護塘一事尤關松
郡民命徵騏肩任五十餘年最後易土爲石厥功最鉅
其他爲善猶小小者也婁令某罷官以逋累久稽徵騏
首倡代輸得回籍遠近聞而義之

奉賢志

馬天麒字石來婁縣人縣胥也李侯復興議興均田均
役法羣蠹爭爲浮言獨天麒持議甚力故復興矢於獄
廟以天麒從查覈編審忝委焉復興罷思變法者皆攻

天麒郡人額憲乞留乃得終始其事具載均役成書復興之卒也郡人買地將留葬遺賈山不果其後遂以葬天麒立碣表焉附李公祠表

黃文遠字爾先華亭人先世籍休寧所居村名高倉明末遭亂兵縛文遠母以索金文遠乞以身代賊感其孝母子並釋入

國朝偕其兄自高倉遷陶宅母沒幾滅性喪葬皆獨任之兄亡撫其兩世孤爲營產完娶生平喜周急貧不能償者焚其券卒年七十有七以子之雋貴贈翰林院編修

奉賢
志

朱紹謨字銘範上海人事後母以孝聞父母沒家益貧
棄書學稼築梅花別陽居焉同祖弟紹鳳時在諫垣紹
謨飭奴隸弗與外事長子廷獻領庚子鄉薦益勉以學
至己未登第回適紹謨八十生朝錦衣奉觴鄉里榮之
兩舉賓筵不赴

上海志

殷鴻逵字翮冲華亭人明諸生吳勝兆之亂父之輅死
江寧母徐文貞孫女兵亂後流離入燕鴻逵遠走千里訪
之遇喬生述所居相近有似其母者鴻逵往就竟見
母奉以歸御史王廣心作烏啼曲以紀其事

徐佺字霄賓婁縣人諸生文貞五世孫詩文閎肆醇雅

名噪幾求兩社入

國朝固窮守約義命自安康熙初太守魯超重其行就訪於所居白洋莊詢以地方利弊佗以松故澤國水利久廢宜疏宜濬言之詳盡超深聽之旋擢去不果行而後之言水利者卒遵其說

費志

夏之夔字西球華亭人諸生博聞彊記詩宗大歷與顧偉南蔣大鴻諸人爲唱和著有復堂稿從子鳴字莘野諸生喜古文詞兼工詩著有寄萃草

金山志

沈大至字伯雍上海人諸生潛心濂洛之學尤邃於易著有四書貫易經原繫辭津綱鑑要及文集數十卷旁

及天文地理醫藥諸書悉究其奧操履方正講學數十年不愧經師康熙四年舉鄉飲賓沒後門人私謚爲敬修先生

上海志

張恆字北山華亭人秀水朱彝尊中表弟壯歲好游歷蘇門求孫徵君鍾元遺書謁耿詹事逸庵於嵩陽訪李中孚王無異二徵君於關內久之著道傳錄若干卷後移家林屋儲書萬卷不汲汲於榮利焉

曝書亭集

陸承勳原名坦字履平婁縣人居千巷陸清獻胞弟幼出嗣母舅曹默從其姓事嗣父母生養死葬盡禮盡誠嗣父母沒後有語以復姓者則曰吾念撫育恩不忍也

臨沒始命子文炯輩歸宗立曹氏之賢者承其祀論者謂恩義兩盡生平取與甚嚴一介不苟不失清獻家法

焉

金山志

陳嘉綬字彭年婁縣人當湖陸清獻妹壻有隱德好學不倦藏書甚富清獻爲之顏其堂曰萬卷子濟字簡庭奉舅氏雜錄一冊寶藏篋衍重加編次各以類分凡十二卷爲三魚堂贖言海寧陳世倌序而梓之又清獻壻李鉉字枚吉金山衛學生品學純粹清獻嘉言懿行罔不心識竝張伯行所刊讀禮志疑問學錄皆其手鈔本詮次年譜一編時人比之李漢之於昌黎黃幹之於紫

陽云妻志

屠旭字初生青浦人諸生工詩子文漪字連水妻學生

宸楨字周士國學生兄弟並以詩名文漪尤精算學旭

父子著述俱詳藝文志

青浦志

陸緯字星聚青浦人諸生工詩古文在春藻會中聲譽

蔚然累試不遇葺茅柰山之麓行吟終老年六十六卒

子晟字臨潭康熙五十三年舉人官宿州教諭晟字扶

桑貢生秉樞字恪斐縣學生並以文稱晟名尤著著述

並載藝文志孫貽穀衛學生工詩早卒

青浦志

王宗蔚字峽文華亭人貢生少與夏存古顧子韶同學

子韶名家駿考功館甥也又與韓友一計子山王麗文

有四子詩餘之作所著有蓉墅樓稿

輞川草參
松江詩鈔

陳治字山農婁縣人諸生工詩出語驚座人平生好游
足迹徧天下耿精忠聞其名具書幣招堅拒之晚歲隱
居浦南與二三知己飲酒賦詩意洒如也喜丹青兼善
岐俞術著有貞白堂稿

金山志

沈天成字上章華亭人康熙十三年耿精忠叛天成與
梁溪嵇永仁會稽王龍光同佐閩督范承謨幕被執械
繫囚獄閱三載抗節不屈聞承謨殉難遂自經事聞

贈國子監學正

松江詩鈔

范青字筠堅上海人諸生詩才敏捷游浙閩制府范忠貞幕相契獨至忠貞死耿逆之亂爲輯其畫壁記傳於

世著有筠堅詩稿其芙蓉影詩三十首盛傳於時

上海志

徐懋勳字南州華亭人居七寶鎮諸生以奏銷案黜初受業於夏考功中歲無聊一託於詩後以秋興詩幾蹈

不測幸中救得釋著有蒲谿草堂集

松江詩鈔

施徵燕字貽孫自號春江釣叟上海人維翰從子問學淵博數奇不偶退居蒲谿之醉墨軒以詩酒自娛著有青門草同郡許纘曾爲序而梓之

上海志

王鏐字紫雋華亭人諸生焯孫嘗舉錫朋振雅諸社晚

年杜門著書於史鑑尤多纂輯詳見藝文中年八十二卒子用汲字長孺著容安堂集宗洛字安世有澄懷軒自娛稿孫廷和乾隆己卯舉人

瑯琊世本

曹爾埏字彥博婁縣人宗伯勳子學士爾堪弟也府學生爲文如其父兄進士單恂目爲鄴中子建早年游伊洛訪孫奇逢講性命之學與羣從結小蘭亭詩社嘗賦銅雀臺詩贈炙人口著有道邇堂集弟爾埴字彥範以貢官桃源教諭條教詳明與陸清獻公締兒女姻共相講學晚年家徒四壁晏如也子鑑如以文名

曹氏族譜

唐于達字用儀華亭人之屏曾孫諸生博學善屬文應

鄉試不利遂謝去舉業從事吟詠嘗與吳日干孫澧有
輩倡和其詩名春浮室稿

華亭志

楊黼字來祉婁縣人少嘗受業陳黃門敦尚氣節以貢
授鴻臚寺序班擢知湯陰縣時滇黔未靖羽書旁午無
寧日黼供億之暇勸農桑興學校人以爲難邑雹災無
麥黼固請蠲免獲減數千民慶更生晉臨江同知攝府
事清江令張某以漕規三千餽峻卻之張內不自安黼
待之如初感悔改行巡撫某與糧道不相能令黼揭之
且休以禍不爲動遂以病乞歸年九十卒黼存心利物
所至有惠政其沒也有不遠千里哭拜其墓者著有泣

湯拙牘濟美堂稿

金山志

黃朱芾字奕藻青浦人曾祖廷瑞以孝行稱祖父早世
廷瑞撫之成立由縣學生以例入貢考授光祿寺典簿
選廣西梧州府通判時南山賊數千人四出鈔略官兵
勦捕半載勢愈張朱芾與梧州副將某統兵深入多俘
獲復以好言撫之盜解散境內以安歷署蒼梧縣及潯
州府篆嘗奉檄查各州邑錢糧盡得其實陞鎮安知府
泗州府土司互爭地久不決事下朱芾馳勘或以三千
金暮夜餽拒之卒於官著有崧村詩稿素心等集

青浦志

鄔景超字曠思上海人有膽略讀孫吳書康熙戊午閏

督姚啓聖進剿鄭逆檄募勇士以壯軍威景超傾家
聚鄉兵百人裹糧應募授守備令以兵隸副將蔣懋賢
麾下軍於赤嶺景超不避矢石屢立戰功辛酉題擢左
都督與督師大臣參議攻取要略癸亥春啓聖督將士
抵廈門與水師提督施琅密籌蕩平策六月

大兵乘風順潮直擣澎湖一鼓而勝賊窮促投誠景超齎
令往臺灣遷鄭逆及逆將劉國軒馮錫範至省十一月
海島盡平景超在行閒六年預機謀經百戰嘗不解甲
立霖雨中者十有二日流矢貫肘拔之裹創復戰終獲
全勝事定後棄官歸與弟克非耕織以養親暇則講論

理學拈題歌詠以爲樂詩詞清逸人不能及云

南匯志

路可適字仲登華亭人高年有潛德康熙己巳

聖祖仁皇帝南巡可適時年八十有五以耆老接

駕蒙

恩賜存問高年扁額

諭華亭令朱騰蛟送至其家閱十一年卒年九十六子垓

自有傳

奉賢志

顧名字予賓青浦人耕讀爲業工詩日於井曰機杼旁

與子女唱和爲樂吳梅村亟稱之予問字七思精篆刻

著有強裁詩草及花果百詠女步見列女傳

青浦志

葉向春字完初華亭人父芳枝病革向春剗右臂肉煮湯飲之疾頓瘳母陳心疾危向春復剗左股以進母亦漸愈其後又有以割股愈親疾者諸生秦曰旦十五歲

遠陸階九歲童陳世恕北郊人宋文愷諸生夏緯

華亭志

丁務輿上海人農家子也嘗路拾書函及白金知其人以父病乞假親友者還之不告姓字又於市南拾數十金經旬無蹤迹揭其事通衢遺金者攜以去莫秉清爲作還金記子守安孝而樸順治十年母諸氏病篤守安割左股作羹以進母病尋愈踰年務輿暴疾瀕死守安復割右股療父後父母壽各八十餘兄弟四人友于無

閒壯年喪偶終身不娶鄉黨稱爲孝義之門

上海志

姜元凱華亭人明太僕少卿雲龍孫幼有至性父鏡如客京師奉母家居或誘以嬉戲不少動歲祿繼以疫元凱默禱天方夜讀聞空中語曰里有孝子勿可犯時道路死者相枕籍鄰人皆無恙又常隨父渡江中流暴風舟幾覆元凱抱父顙天若有挾之登岸者

聖祖仁皇帝南巡內大臣馬公扈蹕至松館其家欲挈之往以親老辭後父失明元凱謁諸醫治之不愈因戚甚嘔血數升死年四十八臨終有詩云但願曾西養曾哲誰知顏路泣顏回聞者悲之

黃一樓集

沈儒字稽中青浦人諸生父君化有怨家詣軍門誣以大逆遣吏捕之時方治反獄株繫日數百人吏至盡室皇懼儒挺身出曰我卽君化也訊時神色不變詞理條暢得釋君化歎曰兒之身我生之我之身兒生之也儒治尙書甚精有尙書說行世

王傳今世說

張之普字閱祖婁縣人父宮字處中初與邵梅芬徐桓鑒王雲游陳大樽之門稱四子在幾社中有聲之普遭母喪哀毀骨立廬墓三年康熙辛酉宮客中州臥病之普星馳省視父沒撫棺哀慟絕而復蘇扶輿歸氣息日微抵家設祭卽瞑目苦次事聞

旌表 金山志

何友晏字九陞華亭人諸生篤志問學歲科試九冠其
曹古今體詩及書畫竝工尤知醫以通才爲世推重輦
下貴人爭延致之康熙初歸里與宋轅文周釜山諸人
同修郡志孫澍字超宗傳其醫頗得神解 奉賢志

莊之遜字志生華亭人年未三十喪偶不再娶鰥居垂
四十年人義之同里高士吳騏沈白竝賦詩贈之騏詩
云南山有貞柏不逐野花春白詩云吉士抱幽素貞心
千載傳 奉賢志

王岐字一鳳華亭人性倜儻具才略郡鹽課徵收輸納

皆在杭州舟楫旅費倍正供竈戶大困岐憫之會同郡王日藻長戶部岐念一切課稅皆所當問因入都具陳利害如其言疏請得

旨以收納屬本郡有司又溫台寧課有改銷攤派一款累及松郡按籍代償每歲計四千二百餘兩岐又具呈兩省會勘得免其有功桑梓類如此

奉賢志

沈宏烈字元功婁縣人以孝聞嘗出資建宗祠戚族貧不能婚葬者贈之惟恐後里有義舉悉竭力身任或力不能舉者務倡先之人高其義生平崇尚實行不以文章馳聲譽康熙十六年郡守魯超核實舉鄉飲

金山志

張至大字伯宏上海人同舉者百人有公藝之目康熙
八年歲饑捐租五百石賑飢里人李二鬻女以償所貸
返其券山右賈人王晉客死爲具棺斂召其子至計其
費而津遣之康熙十二年病置酒召親黨呼其子永吉
取逋券悉焚之薰沐而逝弟至剛字君毅年十八代兄
任北運役同役胡中以舟沈被繫偵囊貸之得釋又因
歲荒賑穀六百石募濬洋涇海塘新港諸河以工代賑
所活萬計人尤誦其高義同時有顧廷銓亦以義行稱
於時

上海志

王懷奇字玉圃先世居薛殿湖贛明末盜起懷奇奉母

遂居朱涇母年七十三終邑養兼至弟亡撫孤姪如己
子俟其壯析己產與之里有節婦年邁與瞽子相依懷
奇時周其乏廿年不倦亦不一語告人子麗天乾隆十

三年進士

金山志

喬恩字三尹上海人父英魁前明諸生母陶氏貧老臥
病恩甫九歲匍匐親串家貸粟以供朝夕日三四返足
盡腫經年無倦色親沒廬墓三年

上海志

侯廷觀字燕胥金山衛人懷遠將軍端十世孫方弱齡
母王氏病危潛割股和藥以進病良已越日家人偵知
之事漸聞邑令旌其閭旣而母沒哀毀踰成人事繼母

如所生待諸弟友于無間以貢授望江縣教諭以才能
卓薦卽擢本邑宰有政聲

徐念肅字慎齋金山衛人父嘉猷以孝行稱嘗割股愈
親疾念肅官山西運判迎父至署邑養倍盡前官沒於
任多虧欠因以二妾獻乞任交代拒不納復經紀其喪
居官廉潔勤慎以父年邁乞終養孫學烜諸生以敦行
好義世其家

金山志

高維岳上海人居周浦鎮父恩好義樂善明萬歷十六
年歲祲煮糜賑飢所活甚衆十九年海溢恩收葬溺尸
無算又重修鄉約助造濟農倉維岳幼有至性父疾革

顧天求代割股和藥以進奉母如父親沒後各廬墓三年明巡按御史某具疏題旌

本朝巡按御史李某亦賜粟帛旌之子象辰孫廷亮俱諸生同邑又有夏汝法母病冬日思魚汝法扶病冒雪求之妻何氏憫姑齒落以乳哺之子廷彥嘗割股以療父疾邑人目爲孝子又有杜啓賢朱養豫臺使竝旌爲孝子云

上海志

丁文揚字君徵上海人崇禎閒出穀賑飢多所全活故人子家貧自鬻爲贖歸兼爲娶婦族叔無嗣奉養終身沒爲營葬又嘗任逃亡者賦役絕無責言同時又有蔡

國珍以歲祲捐貲掩埋并築田圩捍水邑人賴之

南匯志

陳邁字萬之上海人祖星伯年高非甘旨不飽邁夫婦操作以供恆自忍飢祖愛臨摹古帖邁豫購紙筆令無缺康熙七年郡守以順孫旌之

南匯志

徐光祖字明卿華亭人父可大金山衛指揮乙酉殉節光祖事母至孝數十年無少怠撫幼弟成立友愛至老無閒性好施予嘗灌園自給屏迹城市康熙己亥以耆碩舉鄉飲賓子杜國字聖兼諸生品學醇正孫照字赤霞衛學生工詩

金山志

陸潛字伏庵上海人嘗詣邑肆納場課主計者誤溢二

雨有奇至旅舍覺之將往改正或止之曰往返數里且風雨獨不可稍緩乎曰列肆本微虧其本非人情也遂冒雨行時同邑有張士麟者亦以還遺金并完漕米串四十石稱於時

南匯志

張懋信字咸孚上海人諸生侍母疾衣不解帶者累月母卒哀毀幾滅性年未六十而沒子文龍幼通十三經婁縣諸生懋信沒以哀死人咸惜之

上海志

金銘字名佩上海人貢生戚秦某負其債萬五千金逃或勸之訟弗聽康熙十三年軍籍黃文兆以運漕逋欠籍其產入官文兆死於獄銘惻然典貨得金補其數官

乃釋其孤子泐有父風

上海志

唐彬字慧武婁縣人庠生性至孝父醇病沒彬與弟定昌俱赴科試不獲視含斂歸時一慟幾絕潛往投水舟人覺而救之自是思父不已屢投繯於館每爲館童解救至康熙乙丑正月夜竟自縊死同里奚鉉照爲作唐

孝子傳

婁志

唐景隆上海人聘周氏女有癩疾父母欲退之景隆曰命也遂成婚子廷士舉人

南匯志

宋士愷字宣豫華亭人附貢生世有潛德士愷工文藝有藻鑒漕涇范堯公總家貧未遇見其文擊節歎賞曰

此子必掇科第惜天不永以年耳因以女孫妻之已而
成進士官主事蚤卒生平慷慨多大志魁能冠倫足
迹徧南北嘗寄籍湖廣在外廿餘年娶妾生子有庶出
一支猶在襄陽子緣慶孫如璟竝諸生有名於時

陳蓋字辰赤華亭人明祭酒詢之裔孫也爲人有至性
父有疾願以身代旣沒則爲之廬墓三年生平愛讀書
善吟詠著作甚夥惜燬於火今所鐫傳耕堂集五卷乃
劫灰之餘也黃中允之雋爲序稱爲清拔高雅發揮精
切云

奉賢志

吳燧字蕃宣上海人居下沙爲文冲澹淵懿年四十餘

始受知於學使高裔中庚午副榜居家孝友性恬退爲
尙書張照授經於杭之西湖張起麟顧成天輩亦經其
指授著有存初文稿

南匯志

周仁灝字堯天華亭人居大茫蕩慷慨好義臨財不苟
里中有陳氏素饒裕託以家事經二十年及陳沒悉籍
記還之無毫髮私更爲經紀其後事人以爲難嘗賣米
硤石鎮商家誤給二十金舟中檢問知之亟返櫂償其
人性剛直人有過不能忍雖尊貴必面折然坦率無城
府人以是服之

金山志

張用棟字逸九婁縣人寄籍青浦爲名諸生家浦濱有

羣盜夜半入弟室毆弟哀號聲徹戶外用棟急披衣持
挺躍入是時盜數十人鄰人皆莫敢前用棟率兩僕奮
擊之盜走弟得免方擊盜時背負重傷若罔覺者用棟
本儒生以救弟故奮不顧身游京師公卿爭倒屣迎以
國士相待屢試棘闈不售士論惜之

金山志

曹爾埤字珣公婁縣人武選郎珏五世孫幼孤從父謙
撫育之謙卒尙未冠執喪哀毀殯葬如禮長而樸誠寬
厚非意相干未嘗校尤敦倫誼存心利物戚族困乏者
調卹惟恐後荆溪曹王檜貧而喪偶客雲間爾埤愛其
才爲娶名族女舉一子檜卒具殯斂焉甥沈清幼失怙

恃相依撫之如己出沒身不衰族姪鑑遠年八十獨子
館於外暴亡亟爲棺斂不遽使聞知遠卒復爲經紀其
喪其樂善好義多此類嘗著訓家箴云人生相感以誠
造物所忌者僞觀此可覘其學行矣雍正初以子鑑臨

貴封編修

金山志

宋倣業字載南華亭人居青村港父弼前有傳倣業幼
孤事生母金孝母慈祥好施予倣業善體厥志凡所以
厚親黨周貧乏者無不曲盡勞舍火母幾殆從煙焰中
趨入急負以出室中物不顧也母畏寒值嚴冬輒同母
寢以煖其足歷三十年如一日弟侗字謙佩爲諸生有

名屢蹟棘闈絕意仕進言行足式人方之陳太邱

奉賢志

施繼龍字乘六洞庭東山人遷居婁縣西郊嘗拾遺

金於道俟其人至還之

婁志

朱珩字嘉璧華亭人居東新市以孝著於一鄉當事旌

其閭同時有莊廷英路懷耕韓以增莊汝金程坤繆瀛

凌顧榮顧縉或生平色養或割股療親並載邑志孝友

可風以庸行相同不復詮次其事云

奉賢志

陸恆穎上海人家貧至孝母梅氏病絕粒數日恆穎哭

禱竈神割股和藥以進母病尋愈

上海志

徐運泰華亭人相國文貞公裔孫家世義門運泰尤多

陰德與妻朱氏竝年一百有一歲子昌祚年一百有六
歲妻姚氏年一百有三歲昌祚子建章年一百歲妻羅
氏年九十一歲三世澹於名利得全天年而夫婦同臻
壽考尤爲世所罕及云